



**Broj:07-07-243-02/06**  
**Mostar, 24.03.2006. godine**

Na osnovu člana 14. i člana 15. Zakona o električnoj energiji („Službene novine FBiH“ broj 41/02, 24/05, 38/05), člana 12. stav (1) i člana 14. stav (1) Statuta Regulatorne komisije za električnu energiju u Federaciji Bosne i Hercegovine („Službene novine FBiH“ broj 13/04), člana 31. stav (2) i člana 37. stav (3) Poslovnika o radu FERK-a („Službene novine FBiH“ broj 59/04), i člana 49., člana 56. i člana 71. Pravilnika za tarifnu metodologiju i tarifne postupke Regulatorne komisije za električnu energiju u Federaciji Bosne i Hercegovine („Službene novine FBiH“ broj 45/05), Odluka Državne regulatorne komisije za električnu energiju-DEK broj 04-28-232-33/05 od 28.12.2005., broj 04-28-248-29/05 od 31.01.2006. godine i broj 04-28-248-37/05 od 21.03.2006. godine i Rješenja Regulatorne komisije za električnu energiju u Federaciji Bosne i Hercegovine broj 07-02-647-21/18/05 od 24.03.2006.godine i Rješenja broj 07-02-769-13/23/05 od 24.03.2006.godine, Regulatorna komisija za električnu energiju u Federaciji Bosne i Hercegovine – FERK je dana 24.03.2006. godine na IV. redovnoj sjednici donijela

## **ODLUKU**

**o tarifnim stavovima za prodaju električne energije  
tarifnim (nekvalifikovanim) kupcima Javnog preduzeća Elektroprivreda Bosne i  
Hercegovine d.d. - Sarajevo**

### **Član 1.**

Ovom Odlukom utvrđuju se tarifni stavovi za prodaju električne energije za tarifne (nekvalifikovane) kupce koji su priključeni na elektroenergetska postrojenja Javnog preduzeća Elektroprivreda Bosne i Hercegovine d.d. - Sarajevo. Tarifni stavovi su:



TARIFNI ELEMENTI	JEDINICA MJERE	TARIFNI STAVOVI		VISOKI I SREDNJI NAPON			NISKI NAPON				
		SEZONSKI	DNEVNI	110 kV i viši	35 kV	10 kV	DOMAĆINSTVA		OSTALA POTROŠNJA		JAVNA RASVJETA
							I tar grupa	II tar grupa	I tar grupa	II tar grupa	
0	1	2	3	4	5	6	7	8	9	10	11
MJERNO MJESTO KUPCA	KM	VIŠI	-	10,00	18,00	14,00	3,85	3,85	6,60	6,60	3,20
		NIŽI	-	10,00	18,00	14,00	3,85	3,85	6,60	6,60	3,20
OBRAČUNSKA SNAGA	KM/ kW	VIŠI	-	10,20	16,70	22,23	-	-	15,5 9	-	-
		NIŽI	-	7,85	12,84	17,10	-	-	12,0 0	-	-
AKTIVNA ENERGIJA	pf/ kWh	VIŠI	VEĆI	8,29	8,52	9,91	11,82	14,49	15,1 2	26,06	16,79
			MANJI	4,65	4,81	5,51	-	7,80	8,12	13,58	-
		NIŽI	VEĆI	6,61	6,81	7,88	9,35	11,40	11,8 9	20,30	13,17
			MANJI	3,81	3,96	4,49	-	6,26	6,50	10,71	-
PREKOMJERNO PREUZETA REAKTIVNA ENERGIJA	pf/ kvarh	-	-	0,85	2,00	2,50	-	-	3,00	-	-



## Član 2.

U okviru tarifnih stavova nije ukalkulisan iznos poreza na dodatnu vrijednost, za koji elektroprivredno društvo ima obavezu da ga posebno evidentira na svakom pojedinačnom računu kupca.

## Član 3.

- (1) Po nižim sezonskim tarifnim stavovima za prodaju električne energije na području geografskog snabdijevanja Javnog preduzeća Elektroprivreda Bosne i Hercegovine d.d. Sarajevo obračunava se električna energija tarifnim kupcima preuzeta u vremenu od 01.04. do 30.09., a po višim sezonskim tarifnim stavovima električna energija preuzeta u ostalim mjesecima u godini.
- (2) Po manjim dnevnim tarifnim stavovima za prodaju električne energije na području geografskog snabdijevanja Javnog preduzeća Elektroprivreda Bosne i Hercegovine d.d. Sarajevo za tarifne kupce koji posjeduju dvotarifna brojila obračunava se električna energija preuzeta u vremenu od 13.00 do 16.00 sati i od 22.00 do 07.00 sati i nedeljom u vrijeme zimskog računanja vremena, a u vrijeme ljetnog računanja vremena od 14.00 do 17.00 sati i od 23.00 do 08.00 sati i nedeljom, a po većim dnevnim tarifnim stavovima električna energija preuzeta u ostalim satima tokom dana.

## Član 4.

Ova Odluka stupa na snagu danom donošenja, a primjenjivat će se od 01.04.2006. godine, te se objavljuje na oglasnoj tabli FERK-a, web stranici FERK-a i u „Službenim novinama FBiH“.

## O b r a z l o ž e n j e

U skladu sa članom 14. i članom 15. Zakona o električnoj energiji, FERK je pored ostalog mjerodavan za utvrđivanje tarifnih stavova za nekvalifikovane kupce, kao i da štiti prava kupaca, elektroprivrednih društava za distribuciju i proizvođača električne energije, te da nadgleda odnose u elektroenergetskom sektoru i reguliše kvalitet usluga na svim nivoima, kao i tarife i naknade koje se plaćaju na monopolske usluge u distribuciji, imajući u vidu interese i potrebe svih korisnika za snabdijevanjem električnom energijom.



Član 49. Pravilnika za tarifnu metodologiju i tarifne postupke FERK-a propisuje da tarifni stavovi predstavljaju jedinične cijene za tarifne elemente utvrđene tarifnom metodologijom za svaku kategoriju i grupu potrošnje, te da se razlikuju dnevni tarifni stavovi, sezonski tarifni stavovi, tarifni stavovi u zavisnosti od nivoa potrošnje (blok tarifa) i tarifni stavovi u ovisnosti o vremenu trajanja vršnog opterećenja, kao i da FERK posebnom odlukom odobrava i proglašava važećim tarifne stavove po završetku tarifnog postupka. Članom 71. istog Pravilnika određeno je da će FERK, uvažavajući načelo postepenog uvođenja međunarodno prihvaćene regulatorne prakse i postepenog uvođenja opće prihvaćenih međunarodnih standarda u tarifnom postupku, a očekujući uvođenje poreza na dodatu vrijednost, voditi računa o izbjegavanju naglih i velikih promjena tarifa u prelaznom periodu, kao i o postupnom ukidanju unakrsnih subvencija između elektroprivrednih djelatnosti, kategorija i grupa potrošnje, kao i o postepenosti pri odobravanju stope povrata na vlasnički kapital, te da postepenost u primjeni tarifne metodologije u prelaznom periodu podrazumijeva i postepenost u eventualnim izmjenama tarifa, koje će na kraju prelaznog perioda u potpunosti biti zasnovane na opravdanim troškovima.

U cilju provedbe odredbi Pravilnika za tarifnu metodologiju i tarifne postupke, FERK je na osnovu zahtjeva od 01.10.2005. godine Javnog preduzeća Elektroprivreda Bosne i Hercegovine d.d. - Sarajevo i to Zahtjeva za odobrenje tarifa za djelatnost proizvodnje električne energije broj 07-02-647/18/05; Zahtjeva za odobrenje tarifa za djelatnost distribucije električne energije broj 07-02-647/19/05 i Zahtjeva za odobrenje tarifa za djelatnost snabdijevanja električom energijom broj 07-02-647/20/05 (za koje je spojen postupak koji je vođen pod brojem 07-02-769/23/05) dana 08.11.2005. godine donio Odluku o provođenju prvog tarifnog postupka broj 07-07-745-07/05.

Dana 28.12.2005. godine Državna regulatorna komisija za električnu energiju-DERK donijela je Odluku broj 04-28-232-33/05 kojom se Nezavisnom operatoru sistema u Bosni i Hercegovini određuje potreban godišnji prihod za 2006. u iznosu od 3 898 274 KM i utvrđuje tarifa za rad u iznosu od 0,0343 pf/kWh i koja se primjenjuje od 01.01.2006. godine.

FERK je dana 29.12.2005. godine zaprimio dopis od DERK-a pod brojem 01-01-921-02/05 kojim ga DERK obavještava da konačnu tarifu za usluge prenosa električne energije DERK nije utvrdio iz razloga što još nije formirana kompanija u skladu sa Zakonom o osnivanju kompanije za prenos električne energije u Bosni i Hercegovini, kao i iz razloga što je DERK-ov stav da je realan termin za primjenu novih tarifa u elektroenergetskom sektoru u BiH 1. april 2006. godine. Zbog navedenog, FERK je svojim Zaključkom broj 07-07-922-01/05 od 30.12.2005. godine odredio da će FERK donijeti odluku kojom odobrava i proglašava važećim tarifne stavove za tarifne (nekvalifikovane) kupce po završetku prvog tarifnog postupka kada Državna regulatorna komisija za električnu energiju donese svoju odluku o privremenoj tarifi za usluge prenosa i pomoćne usluge, a najkasnije do 01.04.2006. godine do kada se primjenjuju tarifni stavovi u skladu sa odlukom Vlade FBiH („Službene novine FBiH“ br. 57/00).

Dana 31.01.2006. godine DERK je donio Odluku broj 04-28-248-29/05 kojom je odredio potreban prihod na godišnjem nivou za Kompaniju za prenos električne energije u BiH („Elektroprenos Bosne i Hercegovine“ d.d. Banja Luka) za 2006. godinu u iznosu od 123 610 120 KM i utvrdio početnu privremenu tarifu za usluge prenosa električne energije u



iznosu od 1,087 pf/kWh, a koja se primjenjuje od dana upisa Kompanije za prenos električne energije u BiH u Registar pravnih lica Bosne i Hercegovine, kao i da će u periodu do usvajanja konačnih tarifa za krajnje kupce koje donose Regulatorna komisija za električnu energiju u Federaciji Bosne i Hercegovine (FERK) i Regulatorna komisija za električnu energiju Republike Srpske (RSERK), Državna komisija sa FERK-om i RSERK-om, harmonizovati pristup u priznavanju troškova koji najznačajnije utiču na formiranje ukupnog potrebnog prihoda regulisanih kompanija. Nakon toga Državna komisija će, ukoliko ocijeni opravdanim, izvršiti korekciju i donijeti konačnu odluku o tarifi za usluge prenosa električne energije u 2006. godini. U istoj odluci, DERK je naveo da očekuje i podržava regulatore u Federaciji BiH i Republici Srpskoj, te nadležno tijelo Brčko Distrikta BiH da izvrše alokaciju prenosne tarife njenim diferenciranim korištenjem prema strukturi tarifnih elemenata (obračunska snaga i aktivna energija), kategorijama potrošnje i tarifnim stavovima, kao i da bi takve odluke trebale biti razumno sredstvo približavanja tarifa njihovim primarnim ciljevima da budu podsticajne za regulisane subjekte i kupce, odnosno stabilnost odnosa na tržištu električne energije.

Dana 21.03.2006. godine DERK je donio Odluku broj 04-28-248-37/05 kojom Kompaniji za prenos električne energije u BiH („Elektroprenos Bosne i Hercegovine“ d.d. Banja Luka) za 2006. godinu određuje prihod na godišnjem nivou u iznosu od 125.443.181 KM i utvrđuje privremena tarifa za usluge prenosa električne energije kako slijedi: 0,980 pf/kWh za kupce u Bosni i Hercegovine koji preuzimaju električnu energiju sa mreže prenosa ; 0,389 pf/kWh za deklarirani uvoz električne energije iz zemalja koje u okviru Mehanizma kompenzacije između operatora prenosnog sistema (ITC mehanizam) imaju status tvz. Perimeter zemlje; 0,578 pf/kWh za deklarirani izvoz električne energije, a koja se primjenjuje od 01.04.2006. godine. Dalje u Odluci DERK obrazlaže da je istom izvršio podešavanje početne privremene tarife za usluge prenosa električne energije.

Postupajući po navedenim zahtjevima FERK je dana 24.03.2006. godine donio Rješenje broj 07-02-647-21/18/05, kojim je Javnom preduzeću Elektroprivreda Bosne i Hercegovine d.d. - Sarajevo za djelatnost proizvodnje električne energije odobren potreban prihod od tarifnih (nekvalifikovanih) kupaca na godišnjem nivou za 2006. godinu u iznosu od 323.191.612 KM i cijene električne energije na pragu proizvodnih jedinica elektrana i to TE Tuzla: G3 0,11544 KM/kWh, G4 0,07370 KM/kWh, G5 0,15431 KM/kWh i G6 0,06697 kWh; TE Kakanj G5 0,06932 KM/kWh, G6 0,09416 KM/kWh i G7 0,11599 KM/kWh; HE Jablanica 0,02516 KM/kWh; HE Salakovac 0,05950 KM/kWh; HE Grabovica 0,05484 KM/kWh . Rješenjem broj 07-02-769-13/23/05 FERK je Javnom preduzeću Elektroprivreda Bosne i Hercegovine d.d. - Sarajevo za djelatnost distribucije električne energije odobrio potreban prihod od tarifa tarifnih (nekvalifikovanih) kupaca na godišnjem nivou za 2006. godinu u iznosu od 101.274.387 KM i za djelatnost snabdijevanja električnom energijom odobrio potreban prihod od tarifa tarifnih (nekvalifikovanih) kupaca na godišnjem nivou za 2006. godinu u iznosu od 10.664.001 KM.



Imajući u vidu i prihod koji Kompanija za prenos električne energije u BiH i Nezavisni operator sistema u Bosni i Hercegovini ostvaruje od tarifnih kupaca Javnog preduzeća Elektroprivreda Bosne i Hercegovine dioničko društvo-Sarajevo, raspodjela prihoda za planiranu potrošnju električne energije po kategorijama potrošnje je sljedeća:

KATEGORIJE POTROŠNJE	Planirana potrošnja električne energije u	Prihod proizvodnje	Prihod distribucije	Prihod opskrbe	Prihod kompanije za prenos i NOS-a	Ukupani prihod
	(kWh)	(KM)	(KM)	(KM)	(KM)	(KM)
<b>kupci na 110 kV</b>	531.100.000	36.337.075	0	720	5.386.947	41.724.742
<b>kupci na 35 kV</b>	330.456.000	22.765.141	4.331.705	4.512	3.662.858	30.764.217
<b>kupci na 10 kV</b>	526.718.000	44.786.290	11.159.421	37.152	5.838.276	61.821.139
<b>kućanstva - 0,4 kV</b>	1.789.579.000	124.457.005	57.934.125	9.393.585	1.9836.146	211.620.861
<b>ostala potrošnja - 0,4 kV</b>	655.023.000	87.946.913	25.843.060	1.173.312	7.260.441	122.223.725
<b>javna rasvjeta - 0,4 kV</b>	62.230.000	6.899.187	2.006.076	54.720	689.773	9.649.756
<b>UKUPNO</b>	<b>3.895.106.000</b>	<b>323.191.612</b>	<b>101.274.387</b>	<b>10.664.001</b>	<b>42.674.441</b>	<b>477.804.441</b>

Kategorije i grupe potrošnje iz člana 1. ove odluke istovjetne su kategorijama i grupama potrošnje do sada primjenjivanih tarifnih stavova. Kako bi se osigurao pravilniji pristup u tarifiranju, FERK namjerava u narednom tarifnom postupku, unutar kategorije ostale potrošnje, uspostaviti treću tarifnu grupu sa jednotarifnim brojljima, o čemu Javno preduzeće Elektroprivreda Bosne i Hercegovine d.d. Sarajevo treba obavjestiti kupce iz ove kategorije, a prije podnošenja zahtjeva za odobrenje tarifa za 2007. godinu.

FERK je svjestan činjenice da odobreni potreban prihod nije u iznosu kako je obrazloženo u izvještajima voditelja postupka, a koji je zasnovan na troškovima Javnog preduzeća Elektroprivreda Bosne i Hercegovine d.d. Sarajevo, što se jednostavno ne može prenijeti na tarifne kupce bez naglih i drastičnih promjena tarifa. Zato izvjesno vrijeme Javno preduzeće Elektroprivreda Bosne i Hercegovine d.d. Sarajevo i njen većinski vlasnik moraju ponijeti dio tereta sami. Kod razmatranja ovog pitanja FERK je uzeo u obzir i izjave Vlade FBiH sa 139. sjednice Vlade od 29.12.2005. godine kao većinskog vlasnika, koja smatra da u ovom trenutku ne treba doći do naglih i drastičnih promjena cijena električne energije.

Kako se može vidjeti u Pravilniku za tarifnu metodologiju i tarifne postupke FERK-a u poglavlju o prelaznom periodu, politika FERK je da se sektor mora kretati u pravcu tarifa koje pokrivaju opravdane troškove regulisanog preduzeća. Bez sumnje, cilj je FERK-a da regulisane kompanije rade efikasno ostvarujući prihod po regulisanim tarifama koje uključuju razuman povrat. U prelaznom periodu biće potrebno strpljenje dok se ne postigne krajnji cilj – i to strpljenje na strani regulisane kompanije, Vlade FBiH kao većinskog vlasnika i kupaca.



FERK je u svom Pravilniku za tarifnu metodologiju i tarifne postupke zatražio da regulisane kompanije posluju u skladu sa Zakonom o električnoj energiji. Kao što je navedeno u članu 8. tog Zakona, doći će do postepenog uvođenja elektroenergetskog tržišta u skladu sa odlukom koju donese Državna regulatorna komisija za električnu energiju (DERK). DERK je tek nedavno donio nacrt Odluke o otvaranju tržišta koja predlaže da se od 1. januara 2007. godine preduzme prvi korak na otvaranju tržišta kada svi kupci sa godišnjom potrošnjom većom od 10 GWh budu imali pravo da dobiju status kvalifikovanog kupca. To znači da je do tada tržište u Federaciji zatvoreno, što je činjenica priznata u Pravilniku za tarifnu metodologiju i tarifne postupke u članu 73. stav (1). Zato se svi kupci moraju tretirati kao tarifni kupci bez obzira koliko su veliki. Ukoliko elektroprivredno društvo raspolaže sa kombinacijom hidro i termo energije potrebno je da elektroprivredno društvo hidroenergiju isporuči tarifnim (nekvalifikovanim) kupcima. Implementiranje standarda nediskriminacije i obaveze javne usluge nametnute su od strane Parlamenta FBiH u obliku Zakona o električnoj energiji, što znači da sada postoje standardi koje FERK provodi u javnosti što rezultuje nediskriminacijom i pravilnom raspodjelom troškova snabdijevanja.

Važno je da Javno preduzeće Elektroprivreda Bosne i Hercegovine d.d. Sarajevo, kao i cijeli sektor i javnost, razumiju da standardi koje FERK nameće elektroprivrednom društvu su nastali primjenom zakona i sastoje se od ispitivanja i opravdavanja podataka o troškovima koje je uzrokovala regulisana kompanija. FERK se ponaša u skladu sa zakonom; troškove je uzrokovala regulisana kompanija prilikom svog poslovanja.

Kada se radi o tarifama, dužnosti neovisnog regulatora u skladu sa zakonom su verifikacija podataka o troškovima i postepeno uvođenje promjena tarifa s ciljem potkrepljivanja tarifa zasnovanih na troškovima u skladu sa Direktivama EU, Zakona i propisa koje donosi FERK. Regulisane kompanije imaju obavezu da se pridržavaju propisa za snabdijevanje električnom energijom tarifnih kupaca u skladu sa obavezom vršenja javne usluge.

Sve regulisane kompanije koje imaju obavezu vršenja javne usluge moraju obezbijediti električnu energiju svim svojim tarifnim kupcima što je moguće ekonomičnije. Ova obaveza ima svoje osnove u zakonu, a posebno:

- Početna dozvola za rad-licenca za obavljanje elektreoprivredne djelatnosti snabdijevanje električnom energijom prvog reda dodjeljena Javnom preduzeću Elektroprivreda Bosne i Hercegovine d.d. Sarajevo, sadrži obavezu vršenja javne usluge za Javnom preduzeću Elektroprivreda Bosne i Hercegovine d.d. Sarajevo opisanu u stavu 4.2.1. i 4.1.1. tako da: “ Imalac licence obavezan je pridržavati se svih važećih zakona, podzakonskih akata, propisa i standarda FERK-a, a u skladu sa Direktivom EU i međunarodnih sporazuma koje je prihvatila BiH.”

- Direktiva 2003/54/EC vezana za Zajednička pravila za interna tržišta električne energije, u članu 3. opisuje obavezu javne usluge i dužnost kompanije koja ima obavezu javne usluge da štiti svoje kupce. Posebno, formulacija navodi: “. . . U općem ekonomskom interesu, države



članice mogu preduzetništvima koja djeluju u elektroenergetskom sektoru, nametnuti obavezu javne usluge koja je vezana za sigurnost, uključujući sigurnost snabdijevanja, redovnost, kvalitet i cijene snabdijevanja i zaštite okoline, uključujući energetska efikasnost i klimatsku zaštitu.”

- Prema članu 4. Pravilnika za tarifnu metodologiju i tarifne postupke FERK-a, obaveza javne usluge definisana je da “označava obavezu elektroenergetskih preduzeća da vrše izvjesne elektroenergetske djelatnosti kao javnu uslugu, prije svega vezano za sigurnost, redovnost, kvalitet, cijene snabdijevanja i zaštite okoliša u skladu sa zakonom i Direktivama EU.”

- Prema članu 5. Pravilnika za tarifnu metodologiju i tarifne postupke FERK-a, ciljevi metodologije su da za tarifne kupce utvrdi tarife koje su razumne i zasnovane na troškovima, zasnovane na uobičajenoj međunarodnoj praksi.

Obaveza javne usluge znači da elektroprivredno društvo mora raditi u općem ekonomskom interesu tarifnih kupaca, uzrokujući troškove koji su razumni i zasnovani na uobičajenoj međunarodnoj praksi, što podrazumjeva planiranje i isporuku u korist kupaca.

Politika FERK-a je da elektroprivredno društvo treba najjeftiniju energiju isporučiti tarifnim (nekvalifikovnim) kupcima, što podrazumjeva hidro energiju kao i dio termo energije proizvedene sa najnižim troškovima, kao i da obavljanje trgovinske djelatnosti elektroprivrednog društva ne može biti u suprotnosti sa obavezom vršenja javne usluge koja je elektroprivrednom društvu utvrđena u njegovoj dozvoli za rad.

Trošak električne energije za tarifne kupce u ovom tarifnom postupku većim dijelom zasnivao se na procjenjenim podacima podnosioca zahtjeva. Budući da su procjene podložne znatnim varijacijama, u narednom tarifnom postupku, FERK namjerava ispitati mjesečne podatke o stvarnim količinama i cijenama električne energije proizvedene za tarifne kupce iz vlastitih izvora, gdje će kao potpora biti korišten i Izvještaj o gotovinskim tokovima. Nakon sagledavanja ovih činjenica izvršiće se i primijeniti poravnanje podataka o proizvedenoj električnoj energiji za tarifne kupce u narednom tarifnom postupku, uz odbijanje ili odobravanje prihoda za izračunavanje tarifa za 2007. godinu u skladu sa takvim poravnanjem. Kriteriji za takvo neodobravanje troškova ili odobrene prihode svode se na to da li su aktivnosti bile razumne obzirom na činjenice i okolnosti koje su okruživale odluke.

Prilikom donošenja ove odluke FERK je vodio računa o sveobuhvatnom procesu reforme elektroenergetskog sektora u Bosni i Hercegovini, čiji je cilj ekonomski zdrav i održiv razvoj elektroenergetskog sektora, a glavni elementi reforme razdvajanje sadašnjih vertikalno integrisanih monopola na djelatnost proizvodnje, prenosa, distribucije i snabdijevanja električnom energijom i rebalansiranje tarifa. Akcionim planom Federacije Bosne i Hercegovine za prestrukturiranje i privatizaciju elektroenergetskog sektora u Bosni i Hercegovini („Službene novine FBiH“ br.29/05) Vlada Federacije Bosne i Hercegovine je dala okvir koji omogućava provođenje reforme, a elektroprivredno društvo je do potpune





implementacije usvojene tarifne metodologije, dužno izvršiti obaveze definisane Akcionim planom FBiH.

U skladu sa članom 56. Pravilnika za tarifnu metodologiju i tarifne postupke FERK-a vlastita je odluka i nadležnost FERK-a da razmotri i potvrdi sve troškove dostavljene kao podrška predloženim tarifama, da prihvati, odbije ili prilagodi svaku veličinu ili analizu korištenu za proračun predložene tarife. Polazeći od navedenog prava i ovlaštenja, FERK je uzeo u obzir principe transparentnosti i ravnopravnosti svih učesnika na tržištu, a prije svega nediskriminaciju prema bilo kom kupcu električne energije, opredjelivši se za postepeno uvođenje međunarodno prihvaćene regulatorne prakse i postupno uvođenje opće prihvaćenih međunarodnih standarda u tarifnom postupku, kako bi se izbjegle iznenadne i drastične promjene tarifa u prelaznom periodu, a posebno uzimajući u obzir nepostojanje razvijenih socijalnih mjera i uvođenje poreza na dodatnu vrijednost, zbog čega je FERK odlučio da izbjegne nagle i velike promjene tarifa u prelaznom periodu, vodeći računa o postepenom ukidanju subvencija između elektroprivrednih djelatnosti, kategorija i grupa potrošnje, kao i o postepenosti pri odobravanju stope povrata na vlasnički kapital.

Pored navedenog Javno preduzeće Elektroprivreda Bosne i Hercegovine d.d. Sarajevo nije izvršilo računovodstveno i funkcionalno razdvajanje, procjena osnovnih sredstava elektroprivrednog društva verifikovana od Nadzornog odbora u vrijeme provođenja prvog tarifnog postupka nije dostavljena, a mjerna mjesta još uvijek nisu opremljena odgovarajućim uređajima. Međutim, u skladu sa odredbama Pravilnika za tarifnu metodologiju i tarifne postupke FERK-a, u prvom tarifnom postupku pri podnošenju zahtjeva za odobrenje tarifa, omogućeno je regulisanim elektroprivrednim društvima da predlože tarife zasnovane na raspoloživim podacima o troškovima regulisanih djelatnosti, alociranim na tarifne elemente, kategorije i grupe potrošnje u skladu sa postojećom računovodstvenom, informacijskom i poslovodstvenom praksom i tarifnom metodologijom, te da izvrše alokaciju troškova na osnovu procjene uz obrazloženje primjenjenih kriterija i postupaka za alokaciju troškova.

FERK je u razmaranju i odobravanju tarifa u najvećoj mogućoj mjeri poštivao osnovna načela koja propisuju da će tarife biti pravedne i razumne, ravnopravne i određene na transparentan način, uvažavajući da postepenost u primjeni tarifne metodologije u prelaznom periodu podrazumjeva i postepenost u izmjenama tarifa, koje će tek na kraju prelaznog perioda u potpunosti biti zasnovane na opravdanim troškovima, a sve u skladu sa odredbama Pravilnika za tarifnu metodologiju i tarifne postupke FERK-a koje se odnose na prelazni period.

Na osnovu savjesne i brižljive ocjene svakog dokaza posebno i svih dokaza zajedno, Rješenja broj 07-02-647-21/18/05 i Rješenja broj 07-02-769-13/23/05, kao i na osnovu rezultata cjelokupnog postupka, u skladu sa odlukama FERK-a broj 04-28-232-33/05, broj 04-28-248-29/05 i broj 04-28-248-37/05, a slijedeći ciljeve kojima se FERK rukovodio, čije ostvarenje mu je povjerio Zakon o električnoj energiji, a pravila i propisi FERK-a, kao provedbeni akti navedenog Zakona potvrdili, odnosno vodeći se time da tarife trebaju biti razumne, ravnopravne i određene na transparentan način, kao i uvažavajući postepenost u



eventualnim izmjenama tarifa, koje će tek na kraju prelaznog perioda u potpunosti biti zasnovane na opravdanim troškovima, te imajući u vidu sve specifične okolnosti koje postoje u elektroenergetskom sektoru i Federaciji Bosne i Hercegovine uopće, kao i to da je provedba politike FERK-a u neposrednom odnosu sa provedbom aktivnosti iz usvojenog Akcionog plana Federacije Bosne i Hercegovine za prestrukturiranje i privatizaciju elektroenergetskog sektora u Bosni i Hercegovini, FERK je odlučio kao u dispozitivu.

**PREDSJEDNIK FERK-a**  
**Risto Mandrapa s.r.**